

«La valisch sgulanta»

Dis da litteratura per ils uffants

■ (cp) **Sgular davent en pajais esters e passentar ina pluna aventuras, quai dastgan ils uffants e creschids a chaschun dals 20avels Dis da litteratura a Domat. Dumengia, ils 7 da november a las 14.30 represchenta Annina Sedláček sia versiun da la «valisch sgulanta».** Cun quatter sutgas, in orgel da maun e ses dun da cumedianta sgola l'actura *Annina Sedláček* ensemen cun pitschen e grond en pajais lontans. En il toc «la valisch sgulanta» raquinta la giuvna engiadinaisa dal figl d'in affarist che aveva duvrà si tut ses possess. Il public da Domat al chatta be anc en chamischa da notg e pantoflas. Qua al regala in bun ami ina valisch magica. In viadi aventur-entschaiva.

Annina Sedláček è sa laschada ispirar da l'enconuscha paraula «Der fliegende Koffer» da Hans Christian Andersen. Al public dals Dis da litteratura preschenta ella sia versiun da l'istorgia. Il toc rumantsch sa drizza ad uffants dad 1 a 99.

In talent da l'expressiun

Annina Sedláček ha frequentà la scola auta da teater da moviment «Scuola Teatro Dimitri» en il Tessin. Ses engaschament sin il champ da teater cumpiglia bleras spartas: dal teater mit al teater musical, da sauts burlescs enfin a sauts contemporans. Annina Sedláček è in talent da l'expressiun.

Che l'istorgia dad Andersen la pla-



L'actura Annina Sedláček en acziun.

MAD

schia perquai ch'ella cuntegna sezza anc in'istorgia, numnadain quella ch'il figl da l'affarist sto raquintar per pudair maridar la princessa, di l'actura. E che las paraulas dad Andersen sajan pli miaivlas che quellas dals frars Grimm.

L'inspiraziun artistica chatta Annina Sedláček cun leger istorgias, ma surtut era cun far chausas concretas: «Il problem da mia lavur es ch'ella viva uschè ferm dal mumaint. I manca la vart concreta, la vart stabila.» Cun far paun, cusser e far chaltschiel, ma era cun passentar bler temp en la natira stgaffeschia ella puspè in equiliber che la permetta da sa deditgar a l'art dal teater.

En il Grischun è Annina Sedláček en-

conuscha tranter auter per ses teater comic. En sia rolla da clown han ins pudì vesair ella gia pliras giadas ed en divers lieus. Era cun autras figuras comicas ha ella fatg surrir, per exempel sco guida turistica, sco capritschier, sco dunna da pulizia, sco Maruska Maraja ed auter pli. Bliers uffants enconuschan ella sco «Strietta», in toc ch'ella ha preschentà da curt a chaschun da la festa «Convivenza» a Cazas. Sper sia lavur sco actura maina Annina Sedláček era curs da teater e fa lavurs da reschia.

Dis da litteratura a Domat, dals 5-7 da november 2010. Program detaglià en l'internet sin www.litteraturarumantscha.ch.